

## DOMENIE XXIII «VIE PAL AN»

### Antifone di jentrade Sal 118,137.124

**T**u sês just, Signôr, e al va ben ce che tu distinis;  
trate il to famei seont il to boncûr.

### Colete

Diu, che di te nus diven la redenzie  
e nus ven dade l'adozion,  
cjale di bon voli i fîs dal to boncûr,  
par che ducj chei ch'a crodin in Crist  
a vedin sigurade la vere libertât e l'heritât eterne.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Sap 9,13-18

**Cui puedial vê une idee di ce ch'al vûl il Signôr?**

Dal libri de Sapience

Cuâl om puedial cognossi il plan di Diu?  
O cui puedial vê une idee di ce ch'al vûl il Signôr?  
Spaurôs a son i resonaments dai mortâi  
e malsigûrs i nestris pinsîrs;  
parcè che un cuarp destinât a lâ fraidessût  
al ten cjalcjade l'anime  
e la tende di cheste tiere  
e sfracae il sintiment cui masse fastidis.  
O rivin par un pêl a induvinâ lis robis de tiere  
e o stentîn che mai a capî chês ch'o vin sotman;  
ma cui rivaraial a scuvierzi lis robis dal cîl?  
Cui varessial podût cognossi il to pinsîr,  
se tu no tu i vessis dade la sapience  
e mandât jù dal alt il to sant spirt?  
Cussì a son stâts dreçâts i trois di chel ch'al è su la tiere,  
i oms a an imparadis lis robis che tu âs agrât  
e midiant de sapience a forin salvâts.  
Peraule di Diu.

### SALM RESPONSORIÂL dal Salm 89

**R.** Danus, Signôr, la sapience dal cûr.

Tu tu fasis che l'om in pulvin al torni  
dome cul dî: «Tornait indaûr, fîs dai umign».  
Parcè che mil agns pai tiei vôi  
a son come la zornade di îr, biel passade,  
o tant che vie pe gnot une volte di vuaite. **R.**

Intal sium tu ju sfantis;  
a son precîs de jerbe ch'e sverdee:  
a buinore e da fûr e e sverdee,  
sore sere, seade, si secje. **R.**

Insegninus a contâ i nestris dîs,

e cussì o podarìn rivâ a la sapience dal cûr.  
Voltiti, Signôr; fint cuant mo...?  
Ve dûl dai tiei servidôrs. **R.**

Saciinus a buinore cu la tô gracie,  
e o gjoldarìn in contentece par ducj i nestrìs dîs.  
Ch'al sedi sore di nô il boncûr dal Signôr nestri Diu.  
La vore des tôs mans par nô rinfuarce. **R.**

### **SECONDE LETURE Fm 9-10.12-17**

**Fasii acet no plui come un sclâf, ma come fradi une vore cjâr.**

De letare di san Pauli apuestul a Filemon

Benedet, jo Pauli, vieli e in plui cumò presonâr di Crist Gjesù, ti prei par gno fi, che lu ai parturît framieç des cjadenis. Tal mandî indaûr, propit lui, ven a stâi il gno cûr.

O varès vût gust di tignîmal cun me, par che mi servìs tal to puest cumò ch'o soi in cjadenis par colpe dal vanzeli, ma no ai volût decidi cence che tu lu savessis ancje tu, par che la tô opare di ben no sedi sfuarçade ma spontanee. Salacor ti è stât cjolt par pôc timp, par che tu podessis tornâlu a vê par simpri, no plui come un sclâf ma come alc di plui di un sclâf, come fradi une vore cjâr a mi e, cun plui reson, a ti seont il mont e seont il Signôr.

Se duncje tu mi ritegnis par to amî, fasii chel acet che tu mi fasaressis a mi in persone.  
Peraule di Diu.

### **CJANT AL VANZELI Lc 14,27**

**R.** Aleluia, aleluia.

Chel che nol puarte la sô crôs  
e nol ven daûr di me, al dîs il Signôr,  
nol pues jessi gno dissepul.

**R.** Aleluia.

### **VANZELI Lc 14,25-33**

**Chel che nol rinunzie a dute la sô robe, nol pues jessi gno dissepul.**

Dal vanzeli seont Luche

In chê volte, stant che grandis folis a levin cun lui, Gjesù si voltà viers di lôr e ur disè: «Se un al ven di me e nol odee so pari, sô mari, la femine, i fruts, i fradis, lis sùrs e ancje la sô stesse vite, nol pues jessi gno dissepul. Chel che nol puarte la sô crôs e nol ven daûr di me, nol pues jessi gno dissepul. Cui di vualtris, volint fâ sù une toresse, no si sential prime a fâ i conts di ce ch'e coste, par viodi s'al à vonde bêçs par puartâle al colm? Par no che i sucedi che, butadis lis fondis e no rivant a finî i lavôrs, la int ch'e passe e tachi a ridilu e a dî: Chel li al à scomençât a fâ sù e nol è stât bon di finî il lavôr. O cuâl re, lant in vuere cuintri di un altri re, no si sential prime a fâ i conts se cun dîs mil soldâts al pues frontâ il nemî ch'al ven indenant cun vincj mil? E s'al viôt che nol rive, intant che il nemî al è ancjemò lontan, i mande i mes a domandâ cemût ch'al pues cumbinâ di fâ la pâs. Cussì chel di vualtris che nol rinunzie a dute la sô robe, nol pues jessi gno dissepul».

Peraule dal Signôr

**Su lis ufiertis**

Diu, che di te e diven la vere devozion e la pâs,  
danus di onorâ, cun chest regâl,  
la tô maiestât in maniere conveniente  
e, cu la partecipazion a chest misteri sant,  
di sintîsi plui unîts fra di nô.  
Par Crist nestri Signôr.

### **Antifone a la comunion Sal 41,2-3**

Come une cerge e gole un ruiuç di aghe,  
cussì la mê anime ti gole te, gno Diu:  
la mê anime e à sêt di Diu, dal Diu vîf.

### **Daspò de comunion**

Diu, che tu nudrissis e tu fasis vivi i tiei fedêi  
cu la tô peraule e cu la fuarce di chest sacrament dal cîl,  
danus la gracie di cjàpâ zovament dai tancj regâi dal to cjâr Fi  
e di mertâ di spartî par simpri la sô vite.  
Lui ch' al vîf e al regne tai secui dai secui.